

TSY MISY ANTENAINA AMIN'NY PARLEMANTA ETO

Antenimieran'ny mpanitsakitsaka lalàna sy mpingitrika fivoriana

Nisokatra tamin'ny talata 18 Oktobra 2022 teo ny fivoriana ara-potoana faharoan'ireo fahefana mpanao lalàna, fivoriana hifantoka amin'ny fandinihina ny lalàna hifehy ny tetibolam-panjakana amin'ny taona ho avy 2023.

Toy ny mahazatra dia ireo Filohan'ny Antenimiera roa tonta no tompon'ny vava rehefa fivoriana fanokafana, saingy indrisky fa azo lazaina ho tsy naharesy lahatra ny nambaran'izy ireo.

Nandrasana fatratra izay nambaran-dRamatoa Razanamahasoa Christine Filohan'ny Antenimierampirenena, satria solombavambahoaka mpiara-miasa akaiky aminy no nanangantsampona, tsy iza io filay efa tratra nitondra vola tamin'ny baoritra, na ilay depiote vola baoritra, no tratra indray koa nitondra antsokosoko voamboana tany Alaotra.

Mody hentitra i Ramatoa Filoha, miseho ho saropiaro amin'ny andrimpanjakana tarihin'ny, kanefa tsy hita izay fepetra norai-



siny, ilay nanao fahadi-soana moa dia sady tsy taitra no tsy rototra toy ireny olona madio tsy misy pentina ireny. Ingahy Filoha Rajoelina indray mailaka ery namoaka ny didy fanesorana an'Ingahy Minisitry miadidy ny raharahambahiny, dia lasa nifantoka tany ny mason'ny mpanarabovao. Ny tiana amafisina, Ingahy Minisitry miala amin'ny toerana dia tokony ho vita eo ny resaka, fa ny nataon-dRamatoa "Solombavambahoaka Palissandre", na "solombavambahoaka vola baoritra" kosa, sady fandikan-dalàna no fampia-

sana tsy araka ny tokony ho izy ny anaran'ny Antenimierampirenena, mendrika fanasaziana hentitra faran'izay hentitra izany. Mikasika ny fandinihina ny lalàna mifehy ny tetibola 2022, ny mahazatra ny fitondrana Rajoelina dia ny fanaovana fanahy iniana amin'ny tsy famoahan'ny Minisitry miadidy ny fitantanambola ilay volavolandalana lasitra mialoha, mba hahafahana manao tian-kano tsy tiankano izay voalaza ao, ka andrasana fotoana fohy mialoha ny fifaranan'ny fotoampivoriana vao hiaro, amin'izay dia tsy misy ny adihevitra, fa dia

fananganan-tanana tsy ampisainana no ataon'ireo mitonona ho maro an'isa.

Momba ny fifanatrehan'ny fahefana mpanantant-raka sy ny mpanao lalàna dia tsy misy ventiny satria toa fomba fanao fotsiny. Maharitra roa volana ny fivoriana ara-potoana faharoa, tsy ilaina asiana resaka ny momba ny Antenimierandoholona satria olon'ny fitondrana avokoa no any, fa ny Antenimierampirenena aloha dia efa azo antoka fa tsy maintsy seza banga no mameno ny trano fivoriana, satria ho an'ireo solombavambahoaka indrindra f'ireo miaradia amin'ny fitondrana dia mazava ny ao an-tsainy, "mamboly voky tsy mamboly voky", raha atao mahitsihitsy kokoa ny filaza azy dia na tonga mivory na tsia dia tsy maintsy mitomboka ny tambim-pivoriana na "indemnité de session".

Ny fahefana mpanao lalàna no ahitana mpandika lalàna mihoa-pampana, ka ny tena fositra dia tsy ampiharina amin'izay na-

havita ny heloka ny lalàna, fa toa vitavita ho azy ny resaka. Ilay ramatoa filoha dia mbola sahy manitrikitra fa tsy ilaina hono ny fikaonandohampirenena, satria tsy misy krizy hono eto amin'ny firenena, asa inona no ilazana ireny latsabato niteraka adihevitra tany amin'ny Firenena Mikambana ireny sy ny halatra

"pallisandre" tany Alaotra ary ny vono olona tany Ikongo. Noho izany dia tsy misy ny azo antenaina amin'ireo parlemanta, satria ny mamaritra ny antsoina hoe krizy aza tsy hainy, ka tsy maintsy very fotsiny ny volambahoaka lanin'ireo mpanitsakitsaka lalàna sy mpingitrika fivoriana ireo.

Ny Valosoa

Antoko PSD, Mandritsara

Nankalaza ny faha-64 taonan'ny Repoblikan'i Madagasikara

Nankalaza ny faha-64 taonan'ny Repoblikan'i Madagasikara tany Mandritsara faritra Sofia ny antoko PSD, sy ireo mponina tany an-toerana. Nisy tamin'izany ny fiaraha-misakafo niarahana tamin'ireo Sojabe, ary notronin'ireo mpitondra fanjakana tany an-toerana dia ny chef district, ny procureur ary ny commandant de compagnie. Nifampizara ny nofon-kena mitam-pihavanana. Tao aorian'ny fisakafoanana dia nisy ny famelabelarana narahana ady hevitra nandraisan'ny maro anjara mavitrika, mitondra ny lohahevitra: « inona no vokatra azon'i Madagasikara ara politika, ara ekonomika, ara koltoral'ny raha efa nandalo 64 taona tao anatin'ny État unitaire ? » Nisongadina tamin'izany, fa mila hirosoana eto amintsika ny fanaovana ny fitsinjram-pahefana tena izy.

Isambilo

Ny Valosoa sy hadihady

Zava-misy eto amin'ny firenena

Tsy miloko mena intsony fa efa mirehitra afo mihitsy

Tsy miloko mena intsony fotsiny ny tondro manambara ny toe-draharaha rehetra iainana eto amin'ny Firenena fa efa mirehitra afo mihitsy. Tsy azo afenina intsony fa misy ny hiniana arehitra ary ao ireo efa hitan'ny mpitondra fa mirehitra kanefa dia na tsy manana ny fahaiza-manao na ny fitaovana entina mifehy izany na manampi-maso fotsiny ny tomponandraikitra. Efa ela no nirehitra ny afo eo anivon'ny fahefana mpanatanteraka satria nisy fotoana nivoaka ny hefitrano fivoriana ny praiminisitra noho ny nataon'ny minisitry iray izay niseho ho « super ministre » ka tsy azo fehezina sy hahitsy eo amin'ny lalandiso nizorany. Tsy mbola maty ny afo hatramin'izao satria tsy mitsahatra manao izay tiany atao ity minisitry ity ka hita eo anilan'ny filohan'ny Repoblika mandrakariva na aiza na aiza alehany, na any amin'ny fivoriana any amin'ny sehatra iraisam-pirenena aza. Misy ihany koa ireo minisitry tsy hita popoka mihitsy ary tsy fantatra izay nataony hatramin'ny fotoana nanendrena azy ka singanina manokana amin'izany ny minisitry ny fiza-hantany, ny minisitry ny mponina, ny minisitry ny fanatanjahantena sy ny tanora. Misy koa ny nanao be fiavy tany amboalohany kanefa, angamba, afo mololo ihany izany ka lavenona sisa tavela ary anisan'izany ny minisitry ny fitanterana. Hita fa nirehitra tokoa ny afo teo amin'ny minisitry sy ny filohan'ny filankevipitantanan'ny « Madagascar Airlines », maty an-karanany ve ny afo. Tsy mananko lazaina koa ny minisitry manolohana ny fanomezan-dalàna ny « taxi moto » hahazo hanao fitanterana eto an-drenivohitra. Asa anefa raha tsy afaka mitsabaka amin'izany ity minisitry ity kanefa heverina fa andraikina daholo ny sehatry ny fitanterana rehetra. Telo herinandro teo izao dia nirehitra tanteraka i Madagasikara ka niraviravi-tànana ny minisiteran'ny tontolo iainana ka nahafatra izao fitaovana rehetra izao ho entina hamonoana ny afo. Tsy mana-kolazaina amin'izany ny governemanta iray manontolo fa niantso tãnamaro nandeha nantso afo kanefa dia ravin-kazo no nentina tamin'izany. Tsy manana vina ho entina manarina ny lasa lavenona anefa ny mpitondra na dia nampantana aza fa ho rakofana zanakazo ny enina alina hektara eto Madagasikara. Mirehitra tanteraka ihany

koa ny faritra maro eto amin'ny Firenena raha ny tsy fandriampahalemana no tenenina. Vao tamin'ny fiandohan'ity herinandro ity no nisy tanàna iray manontolo nodoran'ny mpiaro ny « vahaoka sy ny fananany » satria, hono, tanàna mpampiantrano sy mpamatsy sakafo dahalo. Amanjatony no tsy manan-kialofana sy very fananana tao anatin'ny indray mipi-maso. Mirehitra indray izany ny afo eo amin'ireto mpandoro tanàna ireto sy ny mponina satria tokony natao izay namandrihana ny dahalo sy namongorana azy, ary inona izao no fepetra ho raisin'ny mpitondra hanarenana ny fiainan'ny mponina ao amin'ity toerana ity. Miaina ao anaty afo be mampatahotra ny mponina manerana an'i Madagasikara amin'izao fotoana izao ary tsy maty maty izany ka may izay andalovan'izany. Taty anatin'ny herinandro, eo anivon'ny fahefana mpanatanteraka ihany dia tsy fantatra iza marina no nandrehitra ny afo, teo amin'ireto telo lahy faratampony ao amin'ity andrim-panjakana ity, satria rakotry ny setroka tanteraka izay nifanarahany izy ireo momba ny safidin'ny minisitry ny raharahambahiny nanameloka ny fibodoan'ny rosiana ny faritra efatra any Ukraine. Afon'apombo ity toe-draharaha ity ka na toa tsy misy afo miredareda aza dia ho may izay manitsaka eo satria tsy azo hiverenana intsony ny latsabato ka raha hilaza ny fitondrana Rajoelina Andry fa tsy nifanarahana izany dia hilaza ny tandrefana fa miandany amin'ny fananiam-bohitra ataon'ny rosiana izany izy Ka tsy hisy antenaina intsony ny momba ireo Nosy Malagasy bodoin'i Lafrantsa, ary ho tapaka tanteraka ny famatsiana ara-bola avy any amin'ny tandrefana ho an'ireo tetikasa. Raha hanambara anefa fa manaiiky ny latsabato dia ho avy ny rosiana amin'ny angady sy ny harona satria nisy nifanarahana ara-tafika teo amin'ity firenena ity sy i Madagasikara. Raha ireo tranga ireo no dinihana dia midedaka sy mandravarava ny afo ary manaparitaka izany haingana ny fitsoaky ny rivotra. Tsy afom-panadivovana ny mpanao ratsy anefa no misy eto amin'ny Firenena amin'izao fotoana izao fa afo mandevona ny tsara sy mampitsiriritra ny hafa.

Andry Tsiavalona



Ny fanamarihana ny 14 oktobra 1958 tany Mandritsara.

TONTOKALO

Ny praiminisitra sy ny governemanta

Toa mamikitra hatrany ka mampiaiky ny mpitazana Ity ilay mody tsy miteny sy tsy misy fahombiazana. Misy ve ny zava-miaina sy tsiambaratelo tanany, Ka leferina hatrany ireo rehetra havendranany ?

Toa mamikitra hatrany ka dia efa igagana, Na dia efa ratsy laza noho ny bizina mafana. Angaha io vitan-teny kely miharo fanadiovan-tena, Fa ahoana ny amin'ny vata nitehirizam-bolamena ?

Toa mamikitra hatrany miaro seza iretsy ekipa, Na dia tapitra manondrana na ny tary na ny sipa. Efa tsisy andrasana aminy ka ikimpiana ny hadalany, Fa avela moramora hanapitra ny taom-piasany ?

...Toa mamikitra hatrany ny olon-dratsy eto amintsika, Manao hevitra maloto sy mampiasa fikafika. Tena mila mieritreritra izaho sy ianao izay mbola hifidy, Tsy hiverenan'ireo ratsy nampisotro ny mangidy !

TSIMIMALO (Oktobra 2022)